

雲南叢書

趙藩題

雲南備徵志卷十三

原任山西武鄉縣知縣 臣王崧編纂

故實十三

春明夢餘錄略 明史稿 求是錄
也是錄 附錄 滇繫所採雜說

春明夢餘錄略

國朝孫承澤撰

雲南領十四府八軍民府惟雲南大理臨安鶴慶楚雄
嵌居中腹地頗饒沃餘俱瘠壤警區大抵一省夷居十
之六七百蠻雜處土酋割據惟黔寧遺法沐氏世守較
廣西貴州省土官差有定制西北有瀾滄衛聯屬永寧
麗江以控吐蕃西有金齒騰衝以持諸甸南有元江臨
安以扼交趾東有曲靖以臨烏蠻各先得其所處惟尋

甸武定防戍稍疎木邦孟密性習叵測元江景東土酋
稱傑老撾車里姻好安南阿迷羅台瘴癘微梗廣南富
州界臨左江不可不加之意也

雲南自貴州烏撒衛入曲靖霑益州爲通衢烏撒衛實
居四川烏撒府之地又自貴州普安州入曲靖又有廣
南府一路出廣西安隆上林泗城今因國禁不由又有
武定一路從金沙江出四川建昌衛今亦莽塞

六詔乃西南夷據雲南全省之地夷語謂王爲詔其都
在大理麗江蒙化及四川行都司建昌之地六詔俱姓
蒙氏凡各嗣代各項父名下一字蒙舍詔在蒙化府浪

穹詔在大理浪穹縣摩些詔在麗江府蒙騫詔在建昌
衛六詔惟蒙舍居南蒙舍至皮羅閣始彊盛滅五詔而
王總名南詔遷大理名太和城子閣羅鳳用段儉魏爲
相獲唐西瀘令鄭回而遵之至其孫異牟尋創立法度
修議禮樂設三公九爽三托諸府之官以分其任回勸
尋歸唐蒙氏厯年二百五十而鄭氏趙氏楊氏迭興皆
不及至石晉天福間段氏始立元世祖得南詔降爲總
管迄明尙爲鎮撫不絕

明史稿

國朝王鴻緒撰

永明王由榔明神宗孫桂恭王常瀛少子也天啟七年

恭王就封衡州崇禎十六年張獻忠陷衡州王由永州入粵西寄食蒼梧明年春三月莊烈帝殉社稷是爲我大清順治元年擊敗闖賊中原底定二年夏

王師南下福王被擒江南平廣東在籍尙書陳子壯將奉恭王監國會唐王聿鍵自立於閩議遂寢是年王薨於蒼梧二子長安仁王由棧亦病卒三年秋八月

王師下汀州執唐王聿鍵粵中總督丁魁楚巡撫瞿式耜巡按王化澄與舊臣呂大器李永茂晏日曙湯來賀董天閔朱治澗周鼎瀚方以智朱容藩林佳鼎程源等議所立乃共推永明王桂太妃王氏曰諸君何患於無

君吾兒仁柔非撥亂才願更擇可者魁楚等請益堅遂以冬十月十四日稱監國於肇慶以魁楚爲大學士兼戎政尙書大器爲大學士兼兵部尙書式耜爲大學士兼吏部右侍郎永茂請終制化澄以下進爵有差未幾贛州報至初唐王舊輔蘇觀生粵人也以擁護功授大學士由粵募師援贛駐南雄不敢進是月

大清兵破贛州觀生奔回廣州至三水魁楚素與觀生不協又聞贛州信乃與司禮太監王坤倉卒奉王奔梧州式耜等力爭不得已而觀生使陳邦彥來勸進復回肇慶十一月唐王弟聿錞浮海至廣州觀生與布政使

顧元鏡總兵林察等擁入廣州城自立僞號紹武招海上鄭石馬徐四姓盜授總兵等官與肇慶相拒是月永明王亦自立於肇慶僞號永曆使給事中彭耀赴廣州諭觀生被殺乃以兵部右侍郎林佳鼎督兵赴三水佳鼎故粵中監司與林察同姓相善察使羣盜詐降佳鼎信之乘勝追至三山口亂作全師皆覆佳鼎同僉事夏四敷赴水死肇慶大震以化澄代佳鼎督師大器辭官入蜀遂以化澄爲尙書起李永茂爲大學士未幾亦罷十二月

大清兵由福建趨潮州惠州俱下之潛師襲廣州執聿

鏹觀生白縊祭酒梁朝鍾太僕侍卿霍子衡等死之餘
皆降聿鏹與周益遼等二十四王俱被殺報至肇慶式
耜請駐峽口太監王坤不從以朱治澗爲兩廣總督守
肇慶奉王走梧州四年春正月大清兵向肇慶治澗走
王由梧州走平樂魁楚走岑溪化澄走潯州

大清兵入肇慶遣別將徇高雷廉三府再取梧州二月
王走桂林以吳炳方以智爲大學士同式耜入閣辦事
以智不至遣使湖南慰勞何騰蛟趣其兵入衛徵四川
文安之雲南王錫衮入閣以周堪賡郭都賢劉遠生等
爲六卿丁時魁金堡等爲給事是時孫可望等方由川

貴入雲南錫袞以道阻不能達安之亦不至魁楚棄王走岑溪

大清兵至薙髮迎降全家被戮旣而平樂亦不守王太恐會武岡鎮將劉承允以兵至全州王坤請赴之式耜諫不聽式耜請保桂林與城俱存亡乃以式耜兼吏兵兩部尚書督師留守以麾下焦連爲總兵封陳邦傳爲思恩侯守昭平王自桂林走全州三月封承允安國公錦衣指揮馬吉翔郭承昊嚴雲從等爲伯御史毛壽登爭之吉翔怒激承允脅王杖壽登及劉湘客吳德藻萬六吉於牙門外承允又力爲申救得免皆奪職以五千

人援桂林挾王歸武岡州改曰奉天府政事皆決於承允矣而承允前所遣援桂兵在城與連兵主客不和於五月中擊傷連大掠城中而去式却檄誅首惡二十餘人効承允馭兵無狀連兵亦出城赴黃沙鎮

大清兵復攻桂林連聞從白石潭回桂林與

大清兵連戰桂林城下眾遂退屯陽朔會陳邦彥以甘竹灘余龍兵犯廣州

大清兵東向又張家玉陳子壯等破東莞高明等縣

大清兵往來追擊桂林稍定封式紹臨桂伯連新興伯王在奉天召戶部右侍郎嚴起恆爲大學士同吳炳入

閤辦事是時

大清兵下湖南何騰蛟退保衡州張先壁走寶慶堵允錫走永定衛忠貞營李赤心等犯荊州不克潰入歸巫馬進忠等遁五溪山中先是承允在湖南受騰蛟節制騰蛟以藤溪之捷請加郝永忠援勦左將軍張先壁援勦右將軍承允怒至是以長沙不守奏解騰蛟兵柄召之入朝先壁奏劾承允專擅騰蛟反和解之及聞先壁提兵至寶慶懼又請命騰蛟督諸鎮兵守衡州夏五月大清兵至衡州永忠遁走騰蛟退保永州湖南巡撫章曠卒於永安秋八月

大清兵由寶慶直趨奉天城外吉翔等挾王走靖州大學士吳炳被執死焉劉承允舉城降參將謝復榮戰死王由靖奔柳州道出古泥總兵侯性司禮監太監龐天壽率舟師迎王宮眷內豎會天雨狼藉泥淖中饑餓無人色性供帳儲峙皆備王喜封性商邱伯以天壽代王坤掌司禮監印九月王在柳州式耜請回桂林會土司覃鳴珂與守道龍文明相讐殺文明走鳴珂大掠城中矢及王舟王南走象時

大清兵已定湖南下永州郝永忠盧鼎等俱還桂林已而騰蛟起恆湘客亦至與式耜議分地給諸將使各自

爲守式耜與連已先復陽朔及平樂陳邦傳由賓州復潯州合兵復梧州廣西全省稍定冬十二月王回桂林式耜起恆與化澄並相騰蛟督師出全州王坤龐天壽掌司禮監事五年春正月敕全州功晉騰蛟定興侯柱國太師兵部尙書趙印選新寧伯胡一青興寧伯焦連新興侯二月

大清兵至靈州郝永忠潰於興安奔還桂林挾王走柳州縱兵大掠滇營兵亦入城縱火相攻朝士皆被戮辱騰蛟聞警馳回連一青等各率所部至是月二十二日大清兵攻桂林式耜城守騰蛟等拒戰時南昌金聲桓

叛於

大清李成棟佟養甲亦尋叛秋八月王至肇慶封成棟將軍以其子元允爲錦衣指揮使冬十月

大清兵抵南昌成棟退奔南康十一月王使盜殺養甲於梧州六年春

大清兵圍南昌又南下湘潭金聲桓死馬進忠等敗走督師何騰蛟被執死於長沙王聞震悼贈中湘王諡忠烈二月李成棟兵敗於信豐渡河墮水死三月

大清兵取衡永堵允錫走尋卒於潯州夏四月孫可望疏至肇慶請封陳邦傳中軍胡執恭矯勅印封可望秦

王而肇慶不知也及實封至不受是冬封皮熊匡國公
王祥忠國公守滇黔十二月

大清兵下廣東七年王自肇慶走梧州高必正與陳邦
傳相讐殺秋九月孫可望由雲南東襲貴州皮熊走清
浪追執之奪其兵又攻遵義王祥自刎死張先璧馬進
忠皆歸於可望勢益強冬十二月

大清兵取廣州范承恩降杜永和奔瓊州

大清兵入桂林留守瞿式耜總督張同敞死之王自梧
州奔南寧陳邦傳在清遠飛帆先歸邀劫從官於藤江
殺部郎潘駿觀童英許王鳳等八年春三月孫可望遣

兵護衛因殺阻秦封嚴起恆楊鼎和劉堯珍吳霖張載述等投起恆屍於水秋九月陳邦傳降於我

大清九年春二月王走安隆改曰安龍府可望歲以銀八千兩米百石上供從官取給焉十年王在安隆日益窮促聞李定國與可望有隙使內監張福祿全爲國諭定國以兵來迎馬吉翔私告可望十一年春三月可望使鄭國王愛至安隆磔福祿爲國與張鐫殺蔣乾昌等十四人以吳毓貞大臣勒自盡十二年可望遣兵犯常德敗歸王在安隆塗葦薄以自蔽日食脫粟守將文吏承可望意無人臣禮十三年李定國敗於新會將由安

隆走滇可望偵知之促王移黔王故遲行定國至遂奉
王由安南衛走雲南居可望署中封李定國爲晉王劉
文秀爲蜀王可望以妻子在滇未敢公爲逆也十四年
王送可望妻子還黔遂舉兵反然人心多不直可望部
下諸將皆願歸定國與定國相拒三岔白文選輕騎奔
定國軍兵旣交部將馬惟興先走遂大敗可望逃回貴
州部將馮雙龍紿之言追兵至可望知人心已散遂挈
妻子赴長沙詣

大軍前降十五年春三月

大清兵三路入雲南夏四月劉文秀卒